

現代生活藝術系列

華嚴經疏論纂要 77

— 十通品

華藏淨宗學會印贈

大方廣佛華嚴經疏論纂要卷第七十七

五臺山清涼國師澄觀疏鈔

太原方山長者李通玄論

閩鼓山私淑比丘道霈纂要

十通品第二十八

○初來意

〔疏〕來意者。爲答第二會中十通問故。以二品明業用廣大。前定此通義次第故。亦由依定發通。

○二釋名

〔疏〕釋名者。通卽神通。謂鈔用難測曰神。自在無權。

曰通。鈔用無極。寄十顯圓。晉經本業。俱稱十明者。委照無遺故。然通與明。經論皆異。故智度第三云。直知過去宿命之事爲通。若知過去因緣行業爲明等。今以此經通卽委照。亦得稱明。如文廣說。故下經云。非諸菩薩通明境界。晉經意存順義。今譯務不違文。鈔言務不違文者。文有十通同。六通故明。但有二十。無從故。

○三宗趣

〔疏〕宗趣者。智用自在爲宗。爲滿等覺無方攝化爲趣。

〔論〕將釋此品。兩門分別。一釋品來意。二隨文釋義。

一釋品來意者。爲明前有十定品。此明以定起用。卽有十種神通。二隨文釋義者。卽明定有十種神通。其十通者。具如下列。如文具明。

○四正釋文。長分爲四。一舉數標告。二徵數列釋。三總歎勝能。四結數辨果。今初。

爾時普賢菩薩摩訶薩。告諸菩薩言。佛子。菩薩摩訶薩。有十種通。

〔疏〕言十者。一他心。二天眼。三知過去劫宿住。四盡未來際劫。五無礙清淨天耳。六無體性無動作。往一切佛刹。七善分別一切言辭。八無數色身。九一

切法智。十八一切法滅盡三昧。此十皆言智通者。皆以大智爲體性故。若隨相說。前八量智。後二理智。據實唯一無礙大智。此十亦是開彼六通。天眼天耳。神足。漏盡。各分二故。天眼約見現未。分成二。四。天耳約音聲言辭。分出五七。亦是約聞聖教。及諸類言辭故。神足約業用及色身。分成六八。漏盡約慧定。分成九十。一三不分。故六爲十。然小乘六通。智用有分。三乘平徧。亦非曲盡。今一乘十通。智用重重徧周法界。猶如帝網。念劫圓融故。尙越彼明。况於通用。爲顯圓旨。開成十通。

○第二徵數列釋中。先總徵。後佛子下別釋。十通。即爲十段。段各有三。謂標。釋。結。今初他心智通。何者爲十。佛子。菩薩摩訶薩。以他心智通。

〔疏〕他心智通初標。標云他心者。智以他心爲所緣。故若直就所緣。應名心差別通。若所若王種類多。種皆能知故。竝依主受名。然智緣他心。諸說不同。安慧論師云。佛智緣他心。緣得本質。餘皆變影。護法論師。則佛亦變影。若緣本質。得心外法。壞唯識。故但極似本質。有異因人。依唯識宗。護法爲正。以今經望前亦未失。以攝境從心。不壞境故。能所兩

亡不礙存故第一義唯心非一非異正緣他時卽
 是自故以卽佛心之衆生心非卽衆生心之佛心
 爲所緣以卽衆生心之佛心非卽佛心之衆生心
 爲能緣如是鎔融故非一非異若離佛外別有衆
 生更須變影却失真唯識義鈔以卽佛心下示法
性他心之相此有兩
 對前對明所緣後對明能緣今初言卽佛心之衆
 生心者明所緣衆生心卽是佛心此明不異次云
 非卽衆生心之佛心者明衆生心與佛心非卽非
 卽故有所緣義非異故不壞唯心義言爲所緣者
 結成所緣揀非能緣也次辨能緣云以卽衆生心
 之佛心者此明能緣佛心卽是衆生心此明非異
 次云非卽佛心之衆生心者此明佛心與衆生心
 有非一義非一故爲能緣非異故不壞唯識之義
 言爲能緣者結成能緣揀非所緣也更以喻况如
 水和乳乳爲所和喻衆生心是所緣水爲能和喻

佛心爲能緣。以此二和合。如似一味。鵝王唳之。乳盡水存。則知非一。然此水名。卽乳之水。又此乳名。卽水之乳。二雖相卽。而有不一之義。故應喻之。以卽水之乳。非卽乳之水。爲所和。以卽乳之水。非卽水之乳。爲能和。義可知矣。若離佛外下。結彈護法言。却失眞唯識者。不知外質卽佛心故。

○二釋相中二。初知一刹。後如一下。以少類多。今

初

知一三千大千世界衆生心差別。所謂善心。不善心。廣心。狹心。大心。小心。順生死心。背生死心。聲聞心。獨覺心。菩薩心。聲聞行心。獨覺行心。菩薩行心。天心。龍心。夜叉心。乾闥婆心。阿脩羅心。迦樓羅心。緊那羅心。摩睺羅伽心。人心。非人心。地獄心。畜生心。閻魔王處。

心。餓鬼心。諸難處衆生心。如是等無量差別種種衆生心。悉分別知。

〔疏〕前中三。初總。次所謂下別。後如是下結。別中有三十類心。闕第三無記。晉經具有於中前十約相。總顯。後二十心。約人別顯。前中初二約性。總該諸心。次二約行。兼濟獨善故。次二約報。天大人小故。上四唯善。次二約向背而順通三性。善唯有漏背。唯是善。通漏無漏。約人辨中。初六約乘。前三是果。後三是因。卽前背生。死心。及廣陜心。次八部約類。卽前順生。死及大小心地獄等約趣。亦順生。死是。

不善心。餘竝可知。

○二以少類多

如一世界如是。百世界。千世界。百千世界。百千億那由他世界。乃至不可說不可說佛刹微塵數世界中。所有衆生心。悉分別知。是名菩薩摩訶薩第一善知他心智神通。

○第二天眼智通

佛子。菩薩摩訶薩以無礙清淨天眼智通。見無量不可說不可說佛刹微塵數世界中衆生死。此生彼善趣。惡趣。福相罪相。或好或醜。或垢或淨。如是品類無

量衆生。所謂天衆。龍衆。夜叉衆。乾闥婆衆。阿脩羅衆。
迦樓羅衆。緊那羅衆。摩睺羅伽衆。人衆。非人衆。微細
身衆。生衆。廣大身衆。生衆。小衆。大衆。如是種種衆生
衆中。以無礙眼。悉皆明見。隨所積集業。隨所受苦樂。
隨心。隨分別。隨見。隨言說。隨因。隨業。隨所緣。隨所起。
悉皆見之。無有錯謬。是名菩薩摩訶薩。第二無礙天
眼智神通。

〔疏標〕云無礙者。見自在。故清淨者。離障故。天眼卽
通。二見無量下。釋中分三。初總明多界相殊。其善
惡趣等。後後展開。如問明品。次所謂下。別名多類。

非一。隨一一類。有前罪等。三如是種種下。委照分明。前但覩其現相。此則照其因緣。十明之目。由此而立於中。初能見分明。次隨所下。所見委悉。言隨所者。所知非一。故後悉皆下。結其無謬。文竝可知。

○第三宿住通

佛子。菩薩摩訶薩。以宿住隨念智通。能知自身。及不可說不可說佛刹微塵數世界中一切衆生。過去不可說不可說佛刹微塵數劫宿住之事。所謂其處生。如是名。如是姓。如是種族。如是飲食。如是苦樂。從無始來。於諸有中。以因以緣。展轉滋長。次第相續輪迴。

不絕。種種品類。種種國土。種種趣生。種種形相。種種業行。種種結使。種種心念。種種因緣。受生差別。如是等事皆悉了知。又憶過去爾所佛刹微塵數劫。爾所佛刹微塵數世界中。有爾所佛刹微塵數諸佛。一一佛如是名號。如是出興。如是衆會。如是父母。如是侍者。如是聲聞。如是最勝二大弟子。於是城邑。如是出家。復於如是菩提樹下。成最正覺。於是處坐。如是座。演說如是若干經典。如是利益爾所衆生。於爾所時。住於壽命。施作如是若干佛事。依無餘依般涅槃界而般涅槃。般涅槃後。法住久近。如是一切悉能。

憶念。又憶念不可說不可說佛刹微塵數諸佛名號。一一名號。有不可說不可說佛刹微塵數佛。從初發心起願修行。供養諸佛。調伏衆生。衆會說法。壽命多少。神通變化。乃至入於無餘涅槃。般涅槃後。法住久近。造立塔廟種種莊嚴。令諸衆生種植善根。皆悉能知。是名菩薩摩訶薩第三知過去際劫宿住智神通。疏標中。謝往之事名宿住。在過去。明了記憶爲隨念。卽宿住之隨念。宿住隨念之通。二能知下。釋相中。二。一知凡事。於中先總。所謂下別。二又憶過去下。知佛事。於中亦二。先約界顯多。但知其果。後又

憶念下。約人顯多。兼知其因。皆以菩薩得九世眼。如見現在故。若不爾者。過去之法。若不落謝。不名過去。若已落謝。無法可知。若但曾經。心中有種影。現前故。說憶知者。是則但見自心。不見彼法。又會不經事。應不憶知。又但見現在。非是過去。何名宿住。餘文可知。鈔皆以已下。此釋知義。而云見者。是知見也。此上正明。二若不爾下。反難成立。二若但下。遮救謂恐救云。昔曾見事。事則雖滅。見種猶存。故得知耳。是則已下。為遮此救。文有三破。一奪破。謂但見心。不見法故。所見不同。豈見現心名宿住智。二又會下。縱許有種。能知見者。昔不經事。應不知見。謂昔為人。何能曾見。今得宿智。廣遠皆知。三又但見下。結成。即乖名破。

○第四知劫通亦從境受名

佛子。菩薩摩訶薩。以知盡未來際劫智通。知不可說不可說佛刹微塵數世界中所有劫。一一劫中所有衆生。命終受生。諸有相續業行果報。若善若不善。若出離若不出離。若決定若不決定。若邪定若正定。若善根與使俱。若善根不與使俱。若具足善根若不具足善根。若攝取善根若不攝取善根。若積集善根若不積集善根。若積集罪法若不積集罪法。如是一切皆能了知。又知不可說不可說佛刹微塵數世界盡未來際。有不可說不可說佛刹微塵數劫。一一劫有不可說不可說佛刹微塵數諸佛名號。一一名號有

不可說不可說佛刹微塵數諸佛如來。一一如來從初發心起願立行。供養諸佛。教化衆生。衆會說法。壽命多少。神通變化。乃至入於無餘涅槃。般涅槃後。法住久近。造立塔廟。種種莊嚴。令諸衆生。種植善根。如是等事。悉能了知。是名菩薩摩訶薩第四知盡未來際劫智神通。

〔疏〕二知不可說下。釋相中二。先知凡後。又知下。知佛前中亦二。先明所依劫。但寄多界以顯多劫。非有際限名及後段。皆盡未來。此位所知。同於佛故。後一一下。顯能依事。義如十地中辨。然大乘宗未

來世法體用俱無。今云何知。依方便教。但見現在
 因種。知當果相。非見未來法體。若一乘宗。於九世
 中。未來中現在。體用俱有。今稱實而知。然非現在
 之現在。故稱未來。鈔然大乘下。總徵知義。謂小乘
 或說三世俱有。未來但未有。用
或縱可見。而未有體。大乘體用俱無。則無可知。見
 依方便教下。答中有二。初依權教立理。答謂見因
 知果。如見色相。知後吉凶。若一乘下。二通
 妨。謂問云。若爾。何名見未來。即答意可知。此有若
 是性有。即同小乘。若是緣有。緣今未會。云何言有。
 若今時看。緣性俱無。以是現在未來。定非有故。若
 逐未來時看。以是未來之現在故。還如今有。此有
 若
下。三立理。重難縱其性有緣有。二俱有。過若今時
 看下。四以理會通。謂不向今時看。未若向今時看

未。此未卽是現在未來。如何得有。若逐未下。
向未來看未來。是未之現在矣。故不異於今。

○第五天耳通

佛子。菩薩摩訶薩成就無礙清淨天耳。圓滿廣大。聰
徹。離障。了達。無礙。具足。成就。於諸一切所有音聲。欲
聞不聞。隨意自在。佛子。東方有不可說不可說佛刹
微塵數佛。是諸佛所說所示。所開所演。所安立。所教
化。所調伏。所憶念。所分別。甚深廣大。種種差別。無量
方便。無量善巧。清淨之法。於彼一切皆能受持。又於
其中。若義若文。若一人。若衆會。如其音辭。如其智慧。
如所了達。如所示現。如所調伏。如其境界。如其所依。

如其出道於彼一切悉能記持。不忘不失。不斷不退。無迷無惑。爲他演說。令得悟解。終不忘失。一文一句。如東方。南西北方。四維上下。亦復如是。是名菩薩摩訶薩第五無礙清淨天耳智神通。

[疏]初標名。畧無智通。若直云天耳。卽當體受名。若取無礙清淨之天耳。卽依有德業受稱。一圓滿下。釋相中三。初總顯德業自在。二佛子下。別示一方業用。三如東方下。舉一例餘。今初九句。皆約用辨德。前之標名。卽是總句。一圓滿者。能互用故。二徧聞十方及九世故。三一時領攬通其源故。四離二

障故。五明了所知故。六緣不能礙故。七非如權小。聞有分限。不盡重重故。八已證得故。九於一切皆自在。故謂欲聞。則細遠無逃。欲不聞。則近大不撓。故云自在。第二別示一方業用。中二。初舉多佛。欲顯聞廣。二是諸佛下。顯聞憶持。於中二。先聞持教。法隨釋可知。後又於下。顯持圓滿。卽能持之相。於中二。先舉所持。上文通顯佛所說法。今辨所說差別。後於彼下。辨能持相。兼明轉化。餘文可知。

○第六無體性智通

佛子。菩薩摩訶薩。住無體性神通。無作神通。平等神

通廣大神通。無量神通。無依神通。隨念神通。起神通。不起神通。不退神通。不斷神通。不壞神通。增長神通。隨詣神通。此菩薩聞極遠一切世界中諸佛名。所謂無數世界。無量世界。乃至不可說不可說佛刹微塵數世界中諸佛名。聞其各已。卽自見身在彼佛所。彼諸世界。或仰或覆。各各形狀。各各方所。各各差別。無邊無礙。種種國土。種種時劫。無量功德。各別莊嚴。彼彼如來。於中出現。示現神變。稱揚名號。無量無數。各各不同。此菩薩一得聞彼諸如來名。不動本處。而見其身。在彼佛所。禮拜尊重。承事供養。問菩薩法。入佛

智慧。悉能了達。諸佛國土。道場衆會。及所說法。至於
究竟。無所取著。如是經不可說。不可說。佛刹微塵數
劫。普至十方。而無所往。然詣刹觀佛。聽法請道。無有
斷絕。無有廢捨。無有休息。無有疲厭。修菩薩行。成就
大願。悉令具足。曾無退轉。爲令如來廣大種性。不斷
絕故。是名菩薩摩訶薩第六住。無體性。無動作。徃一
切佛刹。智神通。

〔疏〕初標名中。有十四名。初一總通。卽無體性。餘皆
別。別中一無功作用。二同理平等。三能普徧。四量
難知。五非謂依體起用。六但隨念卽形。七現有作

用八不動本處。九作必究竟。十用無間歇。亦不斷佛種。十一他不能壞。十二能生善根。十三隨何所詣。於十三中。初二五八。是無體性義。餘卽神通義。此二無礙。故受斯名。二此菩薩下。釋相中三。一明廣大。謂聞多刹佛名。卽見身在彼多刹故。二彼諸世界下。明無量不起等義。謂又於彼佛重聞佛名。便往敬事。受道無著故。三如是經下。明不斷義。謂於多時。體用無礙故。

○第七善分別言音通

佛子。菩薩摩訶薩。以善分別一切衆生言音智通知。

不可說不可說佛刹微塵數世界中衆生種種言辭
所謂聖言辭。非聖言辭。天言辭。龍言辭。夜叉言辭。乾
闥婆。阿脩羅。迦樓羅。緊那羅。摩睺羅伽。人及非人。乃
至不可說不可說衆生所有言辭。各各表示。種種差
別。如是一切皆能了知。此菩薩隨所入世界。能知其
中一切衆生所有性欲。如其性欲爲出言辭。悉令解
了。無有疑惑。如日光出現。普照衆色。令有目者悉得
明見。菩薩摩訶薩亦復如是。以善分別一切言辭智。
深入一切言辭雲。所有言辭。令諸世間聰慧之者悉
得解了。是名菩薩摩訶薩第七善分別一切言辭智。

神通

〔疏〕初標名中。從所了得名。卽依主立稱。若從所發得名卽通持業。二知不可說下。釋相中。二先知言辭。有標列及結。後此菩薩下。明發言詞。謂隨樂差別而發言說故。有法喻合。文竝可知。

○第八色身莊嚴智通

佛子。菩薩摩訶薩。以出生無量阿僧祇色身莊嚴智通。知一切法遠離色相。無差別相。無種種相。無無量相。無分別相。無青黃赤白相。

〔疏〕依所現得名。卽有財立稱。二知一切下。釋相中。

三初知無色。以色卽空故。二菩薩如是下。明能現色。以空卽色故。三佛子下。雙明無色現色。所爲不礙悲故。今初。由了法界無定實色。舉體卽空。非斷空故。空中無色。不礙色故。存亡隱顯。皆自在故。方能隨樂現種種色。故先明之。鈔疏文有二。先彰大意。意明此是卽色之

空。非絕色之真。空故不礙現色。於中先明卽色之空。故能現色。由上無實色故。卽色是空。既卽色是空。故非斷空。又無定實。則顯非常。非是斷空。又顯非斷。以定有則常。定無則斷。故今非斷常。卽真法界。從空中無色下。明空不礙色。故能現色。然此段文。乃含多意。一。第一。謂色空相望。總有三義。一。相違義。故云空中無色。二。不相礙義。故云不礙色。故三相作義。故前云無定實色。舉體卽空。非斷空。故謂此幻色。若不舉體卽空。不成幻色。亦合云。色中無空。故色不礙空。舉體卽色。非斷滅故。以此正說。

了無色義。故唯說色。卽空邊。下第二段。能現色邊。方合明於色。無空等。此三無礙。方曰真空。亦稱妙有。一。第二。此之二句。遣於地前三空亂意。謂無定實色。舉體卽空。非斷空。故遣第二疑。空滅色。取斷滅空。以空中無色。遣第三疑。空是物。謂空爲有。今明空尚無色。豈有體耶。兄色中無空。空定無體。次云不礙於色。故卽遣第一疑。空異色。取色外空。旣云不礙於色。明非色外。離此三過。方曰真空。清淨法界。三。第三。亦合法界觀意。卽第一真空絕相觀。彼有四門。第一。會色歸空觀。卽今門意。第二。明空卽色觀。是第二段。能現色意。第三。空色無礙觀。卽此第三段。無色現色意。第四。泯絕無寄觀。亦在此段之中。彼第一。會色歸空觀。中有四句。各先標後釋。前三標語。皆同云。色不卽空。以卽空故。今云無定實色。以舉體卽空。非斷空。故卽彼第一句。彼云。以色不卽空。是斷空。故云。不卽空。以色舉體。是真空。故云。以卽空。故。今云。不礙於色。卽彼第二句。青黃之相。非卽真空之理。故云。色不卽空。然青黃無體。莫不皆空。故云。以卽空。故。良以青黃無體之空。非卽青黃。故云。不卽空。要有青黃。方說無體。明不得色。

矣。次今云空中無色。卽彼第三句空中無色。故不卽空會色無體。故云以卽空故。良由會色歸空。空中必無色。是故由色空故。色非空也。于三句以法揀情。第四便云。色卽是空。謂凡是色法。必不異真。空以諸色法。必無性。故是故色卽是空。此卽今疏第一法界無定實色。舉體卽空是也。存亡隱顯者。二結成前義於中二意。一者結上空中無色。亡也不碍色。故存也。舉體卽空。非斷空。故兼存亡也。存亡約色。隱顯約空。空理眞常。不可言亡。而色存則空隱。色亡則空顯。此唯約會色歸空以說。若兼第一二不礙現色。是明空卽是色。觀論存亡隱顯者。色卽是空。則色亡空顯。空卽是色。則空隱。色存。然皆卽亡卽存。卽隱卽顯。故云自在。卽以總結爲彼第三空色無碍觀。其泯絕無寄在下釋文。於中

大句。初一總知色性離相。亦無有法而爲空故。餘五別明離何等相。一離差別相。麤妙長短等。同一無生體故。二種種異相虛故。三無量多相離故。又

無大小。絕分量故。四但妄分別。求叵得故。色空二見。皆情取故。卽與不卽。斯見絕故。上通形顯。五離顯相。依形有故。

菩薩如是入於法界。能現其身作種種色。所謂無邊色。無量色。清淨色。莊嚴色。普徧色。無比色。普照色。增上色。無違逆色。具諸相色。離衆惡色。大威力色。可尊重色。無窮盡色。衆雜妙色。極端嚴色。不可量色。善守護色。能成熟色。隨化者色。無障礙色。甚明徹色。無垢濁色。極澄淨色。大勇健色。不思議方便色。不可壞色。離瑕翳色。無障闇色。善安住色。妙莊嚴色。諸相端嚴。

色種種隨好色。大尊貴色。妙境界色。善磨瑩色。清淨
深心色。熾然明盛色。最勝廣大色。無間斷色。無所依
色。無等比色。充滿不可說佛刹色。增長色。堅固攝受
色。最勝功德色。隨諸心樂色。清淨解了色。積集衆妙
色。善巧決定色。無有障礙色。虛空明淨色。清淨可樂
色。離諸塵垢色。不可稱量色。妙見色。普見色。隨時示
現色。寂靜色。離貪色。真實福田色。能作安隱色。離諸
怖畏色。離愚癡行色。智慧勇猛色。身相無礙色。遊行
普徧色。心無所依色。大慈所起色。大悲所現色。平等
出離色。具足福德色。隨心憶念色。無邊妙寶色。寶藏

光明色。衆生信樂色。一切智現前色。歡喜眼色。衆寶莊嚴第一色。無有處所色。自在示現色。種種神通色。生如來家色。過諸譬喻色。周徧法界色。衆皆往詣色。種種色。成就色。出離色。隨所化者威儀色。見無厭足色。種種明淨色。能放無數光網色。不可說光明種種差別色。不可思香光明超過三界色。不可量日輪光明照耀色。示現無比月身色。無量可愛樂華雲色。出生種種蓮華鬘雲莊嚴色。超過一切世間香燄普熏色。出生一切如來藏色。不可說音聲開示演暢一切法色。具足一切普賢行色。

〔疏〕二能現色中。初結前標後。以卽空之色爲妙色。故又色空不二。成上真空不二而二。現斯妙色。色空融卽。爲眞法界。緣起無盡卽一現多。後所謂下。別顯不同。有一百三種。或從色相立名。或就德用受稱。可以意求。然皆是稱法界之色。不同變礙。但隨所顯以立色名。

佛子。菩薩摩訶薩。深入如是無色法界。能現此等種種色身。令所化者見。令所化者念。爲所化者轉法輪。隨所化者時。隨所化者相。令所化者親近。令所化者開悟。爲所化者起種種神通。爲所化者現種種自在。

爲所化者。施種種能事。是名菩薩摩訶薩。爲度一切衆生故。勤修成就。第八無數色身智神通。

〔疏〕三雙明所爲中。初結前後。令所化下。顯其所爲。有十句。竝可知。

○第九一切法智通

佛子。菩薩摩訶薩。以一切法智通。知一切法無有名。字。無有種性。無來無去。非異非不異。非種種非不種種。非二非不二。無我無比。不生不滅。不動不壞。無實無虛。一相無相。非無非有。非法非非法。不隨於俗。非不隨俗。非業非非業。非報非非報。非有爲非無爲。非

第一義非不第一義。非道非非道。非出離非不出離。非量非無量。非世間非出世間。非從因生非不從因生。非決定非不決定。非成就非不成就。非出非不出。非分別非不分別。非如理非不如理。

〔疏〕初標名。從所知真俗等法受稱。二知一切下。釋相中二。初明知法。卽內證事理。後此菩薩下。明演法。卽外益衆生。亦是前明卽事常理。後明卽理恒事。用寂寂用。無障礙故。今初又二。初約離言顯實。一二無我下。約二空顯實。今初三句一向顯實。一名無得物之功故。二緣成無性故。三體絕去來故。

下有三句。相對顯實。然此三對釋有三義。一唯約顯實。則相待而空故。異相互無故。云不異。遮異言不異。亦無不異可得。云非不異。二約雙顯。體則不異。相非不異。三約雙遮。相卽性故。非異性。卽相故。非不異。又相非相故。不異性。非性故。非不異。故離二邊。不住中道。下二對例知。二無我下。約一空顯中。亦初三對。一向顯實。無比者。無有所與我爲比對故。餘二可知。無實下。亦通三釋。准前知之。且約顯實以釋。一虛實皆緣顯故。二法性不並真故。一相。一亦不爲一故。無相。有無皆法。待對故。無法。

與非法。但假施設。竝就實而求。能治所治。無不雙

寂。餘皆倣此。鈔法性不竝下。即影公云。法性不竝。真聖賢無異道。由理無異味故。亦

不爲一者。即法句經云。森羅及萬象。一法之所印。云何一法中。而當有差別。即上一相也。次云。亦

不爲一。爲欲破諸數。淺智著諸法。見一以爲一。即下句意。有無皆法者。釋非無非有。謂有即有法。無

即無法。故云有無皆法。言待對故無者。三論初章中。得云。若有有可有。則有無可無。今無有可有。亦

無無可無。謂因無立有。有假無生。故非有。因有說無。無因有立。故非無。若躡上起。上云無相。即是無

義。今非彼無相。故云非無。無尚不存。有安得立。故云非無非有。皆待對故無也。法與非法者。然法非

法。有其三義。一者有法爲法。無法爲非法。上已破有無故。今非此義。二者惡法爲非法。善法爲法。三

以相爲法。以性爲非法。今通此二。善惡相因。亦假施設。遣相之法。明性爲非法。相既不存。性不安立。

故法尚應捨。何況非法。性相相因。亦假設耳。竝就實下。結成顯實。上一一對中。多以上句爲所治。下

句爲能治。如虛是所治。實爲能治。法是所治。非法爲能治。既並歸實。故皆雙寂。餘皆倣此者。釋不隨於俗。非不隨俗。已下經文。

此菩薩不取世俗諦。不住第一義。不分別諸法。不建立文字。隨順寂滅性。不捨一切願。見義知法。與布法雲。降靈法雨。雖知實相不可言說。而以方便無盡辯才。隨法隨義次第開演。以於諸法言辭辯說皆得善巧。大慈大悲。悉已清淨。能於一切離文字法中出生文字。與法與義隨順無違。爲說諸法。悉從緣起。雖有言說而無所著。演一切法。辯才無盡。分別安立開發示導。令諸法性具足明顯。斷衆疑網。悉得清淨。雖攝

衆生不捨真實。於不二法而無退轉。常能演說無礙法門。以衆妙音。隨衆生心。普雨法雨。而不失時。是名菩薩摩訶薩第九一切法智神通。

〔疏〕第二演法外。益中三。一牒前成智。爲起用所依。故二不捨下。正明演法。三雖知實相下。寂用無礙。於中三。初寂不礙用。次雖有言說下。用不礙寂。後於不二下。寂用無二。

○第十滅定智通

佛子。菩薩摩訶薩以一切法滅盡三昧智通。於念念中入一切法滅盡三昧。亦不退菩薩道。不捨菩薩事。

不捨大慈大悲心。修習波羅蜜未嘗休息。觀察一切佛國土。無有厭倦。不捨度衆生願。不斷轉法輪事。不廢教化衆生業。不捨供養諸佛行。不捨一切法自在門。不捨常見一切佛。不捨常聞一切法。知一切法平等無礙。自在成就一切佛法。所有勝願皆得圓滿。了知一切國土差別。入佛種性。到於彼岸。能於彼彼諸世界中學一切法。了法無相。知一切法皆從緣起。無有體性。然隨世俗方便演說。雖於諸法心無所住。然順衆生諸根欲樂。方便爲說種種諸法。

〔疏〕中三初標名云一切法滅盡者。謂五聚之法皆

當體寂滅故。斯卽理滅。不同餘宗滅定。但明事滅。

唯滅六七心心所法。不滅第八等。鈔。斯卽理下。揀定。謂對餘宗揀

定。體用於中有三。初揀理事。斯卽理滅者。卽是本宗。法界體寂故。不同已下。是法相宗。但事滅故。要

心不行。方稱爲滅。但事滅故。不能卽定而用。證理滅故。定

散無礙。由卽事而理。故不礙滅。卽理而事。故不礙

用。是以文云。雖念念入。而不廢菩薩道等。亦非心

定而身起用。亦不獨明定散雙絕。但是事理無礙。

故上七地云。雖行實際而不作證。能念念入。亦念

念起。淨名云。不起滅定。現諸威儀。皆斯義也。亦非

下。三遮救重揀。凡彼救云。心想雖滅。定前加行。令身起用。故今揀之。亦非我宗。心正在定。不能起故。

此遮法相。次亦非獨明定散雙絕者。此遮禪宗止觀兩亡。不定不亂。糾理頓明。亦頓教意。故非經宗。後但是事理下。方顯正義。心契無礙之理。故事理得定散自在。故七地下。引二經證。並如前說。事理非一故。一切法滅盡之神通。非異故。滅盡卽神通。通二釋也。二於念念下。釋相中。二先明卽定體用自在。後此菩薩住三昧時下。明入定時分自在。前中亦二。先標入定。二亦不退下。明不礙用。於中初二句總。未作不退。現作不捨。正簡事滅以顯真滅。餘句別明。文顯可知。

此菩薩住三昧時。隨其心樂。或住一劫。或住百劫。或住千劫。或住億劫。或住百億劫。或住千億劫。或住百

千億劫。或住那由他億劫。或住百那由他億劫。或住千那由他億劫。或住百千那由他億劫。或住無數劫。或住無量劫。乃至或住不可說不可說劫。菩薩入此一切法滅盡三昧。雖復經於爾所劫住。而身不離散。不羸瘦。不變異。非見非不見。不滅不壞。不疲不懈。不可盡竭。雖於有於無。悉無所作。而能成辦諸菩薩事。所謂恒不捨離一切衆生。教化調伏。未曾失時。令其增長。一切佛法。於菩薩行。悉得圓滿。爲欲利益一切衆生。神通變化。無有休息。譬如光影。普現一切。而於三昧寂然不動。是爲菩薩摩訶薩。入一切法滅盡三

昧智神通

〔疏〕第二明入定時分自在。中三。初長短隨心。二菩薩入此下。威儀不忒。三雖於有無下。不礙起用。定散雙行。於中先法後喻。光影普現。寂然無心。隨器虧盈。體無來去。三是爲下。結名。

○大文第三總歎勝能

佛子。菩薩摩訶薩住於如是十種神通。一切天人不能思議。一切衆生不能思議。一切聲聞。一切獨覺。及餘一切諸菩薩衆。如是皆悉不能思議。此菩薩身業不可思議。語業不可思議。意業不可思議。三昧自在。

不可思議智慧境界不可思議唯除諸佛。及有得此神通菩薩餘無能說此人功德稱揚讚歎。

〔疏〕歎勝能中二。一形劣顯勝。劣不測故。二唯除下。以勝顯勝。謂佛等方測故。

○大文第四結數辨果

佛子。是爲菩薩摩訶薩十種神通。若菩薩摩訶薩住此神通。悉得一切三世無礙智神通。

〔疏〕文顯可知

〔論〕此已上十通。皆以不思議無作無礙無限大自在智。起無限寂用。入因陀羅網境界重重自在法。

門皆不可作三乘有限量見故。如阿那律。我以天眼見三千大千世界。如觀掌中菴摩勒果等。如權教菩薩。見自他佛國往來彼此。皆有量故。此約法身無限。無表裏中間。智身亦爾。總無限故。處帝網重重大用故。總約第一義天。一切智天。非如世間上界諸天眼耳通及三乘聲聞緣覺淨土菩薩通故。以住無體性神通。身恒不離本處。而十方一切諸佛國土。一切衆生國土。皆悉現自在身。及以毛孔。而眼耳鼻舌身心。無不共同一體一性。如因陀羅網。衆像互容。無往來自他之性。此十通體。如是

徧周。如是通徹。名爲神通。以智徧通。與物同性。而
知物故。名爲神通。非是往來自他見故。如此十定。
十通。十忍等。是十地位終。入於生歿利衆生之方
便。亦是十住十行十迴向十地十一地五位通修。
餘義經文自具

寶福禪寺比丘心遇照鼎捐貲刊刻
華嚴經十通品疏論纂要第七十七卷
永遠流通伏願入雜華林遊法界海繁
興萬行廣度羣生仰報佛恩普資三有
康熙己未年十月
華藏室謹題

大方廣佛華嚴經疏論纂要卷第七十七